



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e – mail: info@voda.ba

Broj: **UP-1/21-3-40-536-5/25**
Datum: **28.01.2026. godine**

«Agencija za vodno područje rijeke Save» Sarajevo rješavajući po zahtjevu podnesenom od strane KJKP „Vodovod i kanalizacija“ d.o.o. Sarajevo za izdavanje vodne dozvole za privremeno ispuštanje komunalnih otpadnih voda u prirodni recipijent - rijeku Vogošću, na osnovu člana 109. stav (1) tačka 2. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

R J E Š E N J E **o vodnoj dozvoli**

1. Daje se vodna dozvola KJKP „Vodovod i kanalizacija“ d.o.o. Sarajevo za privremeno ispuštanje otpadnih voda u rijeku Vogošću s urbanog područja općine Vogošća.

Ova dozvola se odnosi na identificirani privremeni ispust iz kanalizacione mreže na desnoj obali rijeke Vogošće:

Redni broj	Ispust	Položaj mjesta ispusta
1	Glavni ispust FB600	Na desnoj obali r. Vogošće, kod željezničkog mosta; (X;Y) 6527370,53; 4861942,40

Lokalna kanalizaciona mreža i izvedeni ispusti na lijevoj obali rijeke Vogošće nisu predmet ovog rješenja i isti nisu u nadležnosti KJKP Vodovod i kanalizacija d.o.o. Sarajevo niti ovo pravno lice upravlja njima.

2. Vodna dozvola se daje na osnovu dostavljene dokumentacije, utvrđenog činjeničnog stanja tokom uviđaja izvršenog na lokalitetima ispusta i uz sljedeće uslove:
 - 2.1. Da se objekti koji čine kanalizacioni sistem održavaju u ispravnom i funkcionalnom stanju u skladu sa njihovom namjenom i ovim Rješenjem.
 - 2.2. Da se permanentno radi na razdvajanju postojećeg mješovitog sistema odvodnje otpadnih voda, te da se prilikom izgradnje nove kanalizacione mreže projektuje i izvodi isključivo separatan sistem odvodnje.
 - 2.3. Da se redovno vrši snimanje i kontrola stanja postojeće kanalizacione mreže. Ukoliko postoje ili se snimanjem na terenu uoče nekontrolisani pojedinačni ispusti fekalnih otpadnih voda u prirodne vodotoke, iste registrirati i što hitnije poduzeti aktivnosti da se isti priključe na postojeće glavne kolektore.
 - 2.4. Da se vodi evidencija svih septičkih jama kao i drugih individualnih postrojenja za prečišćavanje otpadnih voda u području svoje nadležnosti, te da se vode stalne aktivnosti na eliminaciji septičkih jama i upojnih bunara, odnosno da se, gdje god je to moguće, vrši priključenje objekata na javnu kanalizacionu mrežu.
 - 2.5. Da se, prilikom izdavanja odobrenja za priključak na gradsku kanalizacionu mrežu, od korisnika zahtijeva da kvalitet otpadnih voda koje se ispuštaju u javnu kanalizacionu mrežu bude u skladu sa odredbama Uredbe o uslovima ispuštanja otpadnih voda u prirodne recipijente i sisteme javne kanalizacije («Službene novine Federacije BiH», broj 26/20 i 96/20).
 - 2.6. Odobrenje za priključak na kanalizacioni sistem treba da sadrži sve podatke i uslove propisane članom 28. Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj 31/15, 55/19, 41/20 i 63/22) i odredbama Uredbe o uslovima ispuštanja otpadnih voda u okoliš i sisteme javne kanalizacije.

- 2.7. Da se tokom važenja ovog Rješenja vrši monitoring otpadnih voda na ispustu glavnog kolektora ili u zadnjem revizionom oknu neposredno prije ispusta definisanog kao primarni ispušt, u tački 1. dispozitiva ovog rješenja. Monitoring vršiti u skladu sa članom 25. stav (2) Uredbe o uslovima ispuštanja otpadnih voda u okoliš i sisteme javne kanalizacije, te pojedinačne i zbirne godišnje izvještaje dostavljati Agenciji u skladu sa članom 23. iste Uredbe. Do izgradnje odgovarajućeg postrojenja za tretman otpadnih voda ne zahtijevaju se propisani efekti redukcije, odnosno dostizanje graničnih vrijednosti emisije.
- 2.8. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlasti («Službene novine Federacije BiH», broj 14/10, 14/13, 26/14, 23/17 i 41/20).
3. Vlasnik, odnosno korisnik objekata je, u skladu sa Zakonom o vodama i Pravilnikom o načinu obračunavanja, postupku i rokovima za obračunavanje, plaćanje i kontrolu izmirivanja obaveza na osnovu opšte vodne naknade i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16), obavezan voditi propisane evidencije te nadležnim organima dostavljati propisane obrasce (Obrazac EBS) uz redovno dostavljanje obrasca IV – Mjesečni izvještaj o količini isporučene vode i obračunu EBS-a te prema dostavljenim obrascima izvršavati u cijelosti i u propisanim rokovima obavezu plaćanja vodnih naknada za zaštitu voda.
4. Ispuštanje otpadnih voda u rijeke ne smije ugrožavati postojeći hemijski i ekološki status recipijenata.
5. U slučaju vanrednih situacija, havarijskih onečišćenja i drugih sličnih okolnosti, čime bi bio ugrožen kvalitet, obavezno izvjestiti nadležne organe i postupati po nalogu mjerodavnih institucija te preduzimati hitne mjere i aktivnosti na sprječavanju širenja onečišćenja i na otklanjanju uzroka onečišćenja.
6. U periodu važenja ove dozvole, Korisnik je dužan provoditi sve mjere i aktivnosti propisane istom.
7. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima kanizacionog sistema i mjestima ispusta obuhvaćenih ovom vodnom dozvolom, korisnik zaštitnih vodnih objekata nije odgovoran za nastale štete.
8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
U ovoj upravnoj stvari plaćene su sve upravne pristojbe.
9. Ova vodna dozvola, shodno članu 117. stav (1) i 129. Zakona o vodama se daje sa rokom važenja od 5 (pet) godina od dana pravosnažnosti ovog rješenja.
10. Prije isteka važnosti ove dozvole Korisnik je dužan da podnese zahtjev za izdavanje nove vodne dozvole.
11. Ovo rješenje o vodnoj dozvoli može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Od strane pravnog lica KJKP „Vodovod i kanalizacija“ d.o.o. Sarajevo, dana 25.12.2025. godine, podnesen je ovaj Agenciji zahtjev za izdavanje vodne dozvole za ispuštanje otpadnih voda u rijeku Vogošću sa urbanog područja općine Vogošća.

U provedenom postupku, uz zahtjev za izdavanje vodne dozvole dostavljena je i pregledana sljedeća dokumentacija:

- Aktuelni izvod iz sudskog registra broj: 065-0-RegZ-25-013456 od 27.10.2025 godine – kopija,
- Uvjerenje o registraciji poreznog obveznika broj: 04/1-17-1-UPJR/1-7841-2/14 od 12.01.2015. izdato od strane Uprave za indirektno-neizravno oporezivanje Bosne i Hercegovine – kopija,
- Uvjerenje o poreznoj registraciji od 24.05.2006. godine izdato od strane Porezne uprave – Kantonalni ured Sarajevo – kopija,
- Punomoć OB-09-07 od 15.12.2025. godine, podnosiocu zahtjeva da može zastupati KJKP „Vodovod i kanalizacija“ d.o.o. Sarajevo – original,
- Rješenje o vodnoj dozvoli broj: UP-I/25-3-40-356-6/20, od 24.12.2020 godine, izdato od strane Agencije za vodno područje rijeke Save Sarajevo – kopija,
- Operativni plan incidentnih zagađenja, KJKP „Vodovod i kanalizacija“ d.o.o. Sarajevo, privremeni ispust otpadnih voda sa urbanog područja općine Vogošća – kopija,
- Izvještaj o monitoringu kvaliteta i kvantiteta otpadnih voda iz glavnog ispusta kanalizacione mreže u rijeku Vogošću, broj 2224/25, Inspekt RGH d.o.o. Sarajevo - kopija,
- Situacioni prikaz kanalizacionog sistema – dio općine Vogošća
- Dokaz o uplaćenju upravnoj taksi.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari.

U skladu sa članom 12. stav (5) i (6) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22 izvršen je obilazak ispusta otpadnih voda iz kolektora i tom prilikom sačinjen zapisnik o uviđaju broj: UP-I/21-3-40-536-2/25 od 16.01.2026. godine.

Prilikom uviđaja na terenu registriran je kanalizacioni ispust, nizvodno od željezničkog mosta, u urbanom dijelu općine Vogošća i naveden je u tački br. 1 rješenja.

Odvodnja otpadnih i oborinskih voda urbanog područja se uglavnom zasniva na dva glavna kolektora sa lijeve i desne obale rijeke Vogošće, sa direktnim ispustima u otvoreni vodotok rijeku Vogošću, bez prethodnog tretmana.

Ispust kolektora sa desne obale rijeke Vogošće je FB600 nizvodno od željezničkog mosta. Duž korita rijeke je izvedeno više ispusta oborinske kanalizacije.

Kanalizaciona mreža sa pripadajućim ispustima na lijevoj obali rijeke Vogošće nije u nadležnosti KJKP Vodovod i Kanalizacija d.o.o. Sarajevo, te isti nisu obuhvaćeni ovim rješenjem.

Tačka 3. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11, 88/12 i 03/16) i Odlukom o visini posebnih vodnih naknada («Službene novine Federacije BiH», broj 46/07, 10/14 i 03/16).

Na osnovu dostavljene dokumentacije i uviđaja izvršenog na predmetnim lokacijama ispusta otpadnih voda u prirodni recipijent a u svrhu smanjenja negativnih uticaja predmetnih aktivnosti na stanje voda i vodni režim, podnosiocu zahtjeva su ovom vodnom dozvolom u tački 2. dispozitiva Rješenja propisani uslovi u skladu sa odredbama člana 115. do člana 118. Zakona o vodama, člana 12. i 13. Pravilnika o sadržaju, obliku, uslovima, načinu izdavanja i čuvanja vodnih akata i odredbama Uredbe o uslovima ispuštanja otpadnih voda u okoliš i sisteme javne kanalizacije.

Na osnovu provedenog postupka, konstatuje se da je podnosilac zahtjeva KJKP „Vodovod i kanalizacija“ d.o.o. Sarajevo, ispunio minimum uslova za dobivanje vodne dozvole za ispuštanje

otpadnih voda u rijeku Vogošću sa urbanog područja općine Vogošća, te je riješeno kao u dispozitivu ovog Rješenja.

U skladu sa članom 61. Zakona o vodama i odredbama Pravilnika o postupcima i mjerama u slučajevima akcidenta na vodama i obalnom vodnom zemljištu («Službene novine Federacije BiH», broj 71/09 i 102/18) utvrđene su obaveze u tački 5. dispozitiva ovog Rješenja.

Podnosilac zahtjeva je uplatio upravnu taksu u iznosu od 70 KM u skladu sa Zakonom o federalnim upravnim taksama i tarifom federalnih upravnih taksi («Službene novine Federacije BiH», broj 6/98, 8/00, 45/10 i 43/13).

Uputa o pravnom lijeku:

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva u roku od 15 dana od dana prijema Rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta:

Adnan Bašić, dipl.inž.građ.

Po ovlaštenju

Rukovodilac sektora za izdavanje vodnih akata



Nihad Pezo, dipl.inž.građ.

Dostaviti:

- KJKP "Vodovod i kanalizacija" d.o.o. Sarajevo, ul. Jaroslava Černija br. 8, 71000 Sarajevo
- ⊙ AVP Sava, ISV – Vodna knjiga;
- Sektor 50,
- Sektor 40, arhiva
- oglasna ploča AVP – Sava